



**TERTIB ACARA KEBAKTIAN MINGGU
GKPS P.BULAN-RESORT POLONIA MEDAN
Minggu Judika (Luluhon ahu Ham Naibata)
21 Maret 2021**



TOPIK: "Kristus Pokok ni Haluahon"

Live streaming: www.gkpspadangbulan.com/tv

Tata Ibadah: <http://www.gkpspadangbulan.com/tatib>

1. Votum – Introitus – Tonggo

P. Riap ma hita jongjong!

Ibagas goran ni Naibata Bapa pakon Tuhan Jesus Kristus ampa Tonduy Na Pansing, Sitompa langit pakon tanoh on. Amen
Pintori Ham ma ahu, ale Naibata, patorsa Ham ma pakarangku marimbang bangs ana so Daulat; paluah Ham ma ahu humbani halak panipu pakon pargeduk. Haleluya, Haleluya, Haleluya.

K : Haleluya, Haleluya, Haleluya (idodingkon)

P : Martonggo ma hita! Ham Tuhan paridop ni uhur anjaha parpitor. Tarima kasih ma Bamu, ai ipaluah janah ipatorsa Ham do hanami humbani hakahouon ampa tahi-tahi ni parjahat. Goki Ham ma uhurnami marhitei Tonduy-Mu Na Pansing in, ase la ma mangajari hanami, laho mangahapkon bangga ni sitaronon ni Anak-Mu mangkopkop janah mamintori hanami. Luluhon Ham ma hanami bani ganup goluhnami, ai Ham tumang do haporusannami ronsi sadokah ni dokahni. Marhitei-hitei Jesus Kristus Tuhannami, jalo Ham ma tonggonami on. Amen (*Hundul Kuria*).

2. Mandoding 228. O Jesus na Marsangap in (1-2)

1. O Jesus na marsangap in, Ham Raja ni Kuria-Mu

Parmahan na madear

Tongtong itatap Ham do in, ganup na pinaluah-Mu,

Ganup nirajaan-Mu.

Tatap Ham na martumpu i rumah-Mu on ganupan,

Ileobei-Mu o Tuhan.

2. Martuah do Kuria-Mu, ai na holong do uhur-Mu,
mambaen hagoluhanni;
Sai dong do pambobai in, na mangajari ganup in,
patorsa parlahou ni.
Ulang hurang bai Kur ia-Mu na susi pandita ni,
na sai tong bujur uhurni.

3. Sai tatap Ham ganupan on, i lobei-Mu do jongjong on,
manjalo jabatanni.

Na manampeihon tangan in, parhiteian-Mu mando in,
mambaen hatuahonni.

Suruh, sorap Tonduy-Mu Napansing in lao pagogohkon,
ase marhapanditaon

3. Hasasapan ni Dousa

P. Riap ma hita jongjong!

Martonggo ma hita, sopotkon hita ma dousanta hubani Tuhan Naibata.

Ham Tuhan Naibata Bapanami paridop ni uhur hubani jolma pardousa. Domma iberehon Ham Anak-Mu Jesus Kristus gabe jolma anjaha manaron hahirion pakon hadoyukon, pala matei tarsilang laho mangkopkop hanami anjaha mulak manggoluh, naik hu nagori atas laho mangapiti hanami. Tapi gati lang iahapkon hanami bangga ni pangkopkop-Mu in bannami, janah gati seng ihargahon hanami in bani goluhnami. Haganupan in, in ma pangkorhon ni ginjang ni uhur, hampung janah hurang ni pangarusionnami. On pe na roh ma hanami hu Bamu mansopotkon dousanami. Sai palumbang Ham ma uhur-Mu, sasap Ham ma dousanami. Pargogohi Ham ma hanami laho manangihon hata-Mu, ase lambin ididah, iahapkon janah iarusi hanami na dob ihopkop Ham do hanami. Ajari Ham ma hanami, ase ibotoh hanami martarimakasih marhiteihon ni uhur, hata ampa pambahenannami. Jalo Ham ma tonggo elekeleknami on ibagas goran ni Anak-Mu Jesus Kristus, Sipaluah hanami. Amen (*hundul kuria*)

4. Mandoding 353. Marsora do Tonduy ni Tuhanta in (1+2+5)

1. Marsora do Tonduy ni Tuhanta in.

Gati lang itangar, itulak ham in.

Sai tanda dousamu sopotkon homa.

Holong do atei-Ni isasap do in.

2. Marunduk ni uhur sopotkon ma in,
pambaen mu na jahat ampa jungkatmin.
Ondoskon bai Jesus bulat dirimin,
tongtong ma sai dingat pangkopkop-Ni in.

5. Sai jolom tangan-Ni pangindo ma on:
Ramoti puhoi au susianmon.
Pabulat uhurhu patoguh au on,
manggolom hata-Mu bani goluhkon

5. **Hata haporsayaon**

P. Riap ma hita jongjong!

Saksihon hita ma haporsayaonta in, songon na sinaksihon ni haganup halak na porsaya bani sab tanoh on!

P+K. Ahu porsaya bani Naibata Bapa, Pargogoh na so tarimbang, na manompa langit pakon tanoh on. Ahu porsaya bani Jesus Kristus, Anak ni Naibata na sasada in, in do Tuhanta, na tinubuhkon ni si Maria sanggah nape haliaban, marhitei Tonduy Na Pansing. Na manaron na parngit, bani panorang ni si Pontius latu, iparsilangkon, matei anjaha itanom, turun hu nagori toruh. Mulak manggoluh humbani na matei bani ari patoluhon. Naik hu surga anjaha hundul i siamun ni Naibata Bapa, Pargogoh na so tarimbang in. Hunjai ma la mulak magira laho manguhumi halak na manggoluh pakon na dob matei.

Ahu porsaya bani Tonduy Na Pansing, bani kuria parsadaan ni namapansing in, bani hasasapan ni dousa, bani parpuhooon ni angkula, pakon bani hagoluhan na sadokah ni dokahni. Amen

6. **Tingting + Tonggo Pangapition**

7. **Mandoding 339. Jesus Haposanku (1+2+5)**

1. Jesus haposanku, Ham ma hasomanku

Ulang au tarpunjung, seng dong hasomanku

Jesus haposanku, hasomani ahu

Ham ma hasomanku, bai pardalananku

2. Ham tumang Rajangku, Ham do balosanku

Jalo Ham ma ahu gabe jabolon-Mu

Sai sonang ma ahu ai tangkas ma bangku

Ham tumang Rajangku janah balosanku

5. Jesus do Tuhanku baen batar-batarhu
na gabe onjolan ni haporsayaon
Lang be au mabiar 'ge bai parmaraan
Jesus do Tuhanku baen pangajamanku

8. **Ambilan: Heber 5:5-10**

9. **Manggalang:**

P. Paima iondoskon hita galanganta, tangar hita ma lobei hata ni Naibata na gabe onjolan banta laho manggalang, aima na tarsurat bani: **Heber 13: 16** **“Mambahen na madear ampa na marsibere-bere, ulang ma halupahon nasiam ai, ai galangan na sonai do iharosuhkon Naibata”**
Sonari patumpu hita ma galanganta.

245. Na Marmahani Hita

1. Na marmahani hita parholong atei in
In ma Tuhan Jesus sibere buah in, sibere buah in

2. Itatap hamarsikon ni jolma haganup
Seng dong be hasonangan, na kahou do ganup, na kahou do ganup

3. Ai do 'se roh Tuhanta hu hasiangan on
Manobus ganup jolma mangkopkop hita on, mangkopkop hita on

4. Ibere do diri-Ni hu hamateian in
Ai ia gabe gantih ni manisia in, ni manisia in

10. **Tonggo Galangan – Panutup :**

P. Riap ma hita jongjong!

Martonggo ma hita mangondoskan galanganta hubani Naibata!

Ham Tuhan Naibata, simada hanami pakon haganup goluhnami. Tarima kasih ma hatahononami hu Bamu, halani iparmudu-mudu, iparorot janah ipasu-pasu Ham do goluhnami. Ibere Ham do homa parhiouon, hajorgiton, sipanganon pakon siinumon ronsi na porlu bani goluhnami. Tanda ni tarima kasihnami, iondoskon hanami do hu Bamu goluh pakon pasu-pasu na dob binere-Mu, na ipatumpu hanami on gabe galangannami. Papansing anjaha pasu-pasu Ham ma on gabe galangan na misbou i lobei-Mu bahen

hasangapon-Mu janah mambahen lambin marhataridahan harajaon-Mu i dunia on. Sai tambahi Ham ma pasu-pasu-Mu janah sai lambin paganda Ham ma holong ni atei-Mu hu bannami. Ajari Ham ma hanami, ase lambin igalangkon hanami dirinami pakon hinadongannami hubani harajaon-Mu bahen hamuliaon-Mu, ibagas goran ni Anak-Mu Jesus Kristus, Sipaluah hanami. Amen

P: Mandodingkon Hal. No. 281: 5

Bamu, o Tuhan manambah au on
Bamu ganupan na dong bangku on
Seng bulih be sirang na rapat Bamu
Martuah sai sonang na roh hu Bamu

11. TONGGO HAM BAPANAMI

P : Ham Bapanami na i nagori atas. Sai na papansing ma Goran-Mu. Sai roh ma harajaon-Mu. Sai saud ma harusuh ni uhur-Mu i nagori tongah on songon na i nagori atas. Bere Ham ma bannami sadarion hagoluhan ari-ari. Sasap Ham ma dousanami songon panasapnami bani dousa ni hasoman na mardousa dompak hanami. Ulang hanami bobai Ham hu parlajouan. Paluah Ham ma hanami humbani pangagou.

K : Ai Ham do simada Harajaon pakon Hagogohon ampa Hasangapon sadokah ni dokah ni. Amen (Idodingkon)

12. PAINGKATKON/PENGUTUSAN

P: Laho ma hanima hu sab dunia on, ambilankon hanima ma Ambilan Na Madear in bani sagala na tinompa.

13. PASU-PASU

P : Jalo ham (hita)ma pasu-pasu humbani Tuhan Naibatata:
Ipasu-pasu anajah iparorot Tuhan Naibata ma ham (hita). Isondangkon Tuhan Naibata ma bohi-Ni hu bamu (hu banta) janah maidop ma uhur-Ni mangidah ham (hita). Idompakkon Tuhan Naibata ma bohi-Ni hu bamu (hu banta) janah ipasorap ma damei-Ni bani tonduymu (tonduyta bei). Amen

K : Amen, Amen, Amen (idodingkon)